

東
華
續
錄

東華續錄

咸豐九十一

王先謙敬編

臣陶潛宣恭校

閏三月乙未朔諭內閣喬松年奏河督擅截江北餉銀一摺江北糧臺待餉孔殷乃庚長既將淮北存鹽提取兩萬包變價充餉復將山西解赴江北糧臺餉銀擅自截留實屬不顧大局著交部議處○諭軍機大臣等朕聞川省剿辦滇匪甚不得手賊從自流井竄出後提督占泰帶兵猝遇賊伏並未接戰遽行潰散折回省城軍裝器械盡爲賊有以致人心震恐城門晝閉又聞自川至陝沿途有攜帶軍械之兵丁紛紛逃散占泰係統兵大員如果剿賊失利遽退回省因而省垣戒嚴何以曾望顏並未據實查參著該署督明白回奏毋得稍有隱飾至川省正在用兵而逃兵滿路更屬

不成事體著曾望顏查拏嚴行懲辦以伸軍律本日該署督奏滇匪竄陷青神等處雖經官兵收復青神彭山兩縣而浦江偏近省垣尙爲賊踞務卽督飭將弁迅速收復毋令該匪久踞致滋蔓延將此由六百里諭令知之○諭前因浙省軍需緊要諭令慶端等籌撥銀十萬兩惲光宸亦由江西籌撥協濟茲據瑞昌奏見在地方殘破軍餉浩繁福建籌款尙無咨會江西僅據來咨止能解銀三萬兩不敷應用等語浙江省垣雖已克復餘匪尙未肅清該省甫被蹂躪經費無出著慶端瑞璜仍遵前旨於福建迅速籌撥委派妥員解赴浙省交納江西於擬解三萬兩外著毓科再行設法籌解以濟急需均不得遲延推諉致有貽誤將此由六百里各諭令知之○諭瑞昌奏代辦巡撫事務委署各缺並咨請學政回省商辦善後各等語張玉良一軍已准其畱於杭州防剿此時臨安

及湖屬各邑已先後克復仍著張玉良督飭援浙各軍分投按剿務令全省肅清毋畱遺孽至杭州滿洲營兵額爲數無多如恐不敷守禦卽著瑞昌來存查照湖北章程將所有駐防餘丁挑選年力精壯者勤加操練以備緩急所請調撥京兵之處已批示不准行至張錫庚諒已到省司道等缺該將軍均已派員署理一切善後事宜不患無人商辦該學政職司考校俟王有齡到省後仍著出省接試各屬毋誤考政所有羅遵殿等殉難情形及此次所奏仲孫懋於何處陣亡並此外官紳下落均著王有齡查明具奏其脫逃監犯務卽拏獲懲辦被劫之存庫錢銀倉米詳查數目一併具奏將此由六百里各諭令知之○何桂清奏英酋普魯斯接到軍機處駁飭回文大爲拂意旣先遣輪船南北分駛復有兩國發兵卽到上海並分路竄擾等語奏入諭何桂清仍飭薛煥等相機

○杭州將軍瑞昌等奏查杭省駐防滿營兵額不敷布置由
京營揀選勁旅二三千名派員統帶來杭協同防守得旨來存係
廣州駐防容或不知瑞昌在鑾儀衛當差有年安有不知之理京
營勁旅豈能遠戍杭城所奏殊屬不知政體○河南巡撫慶廉奏
此次軍務爲日過久一切用項繁多勢難隨時截數請將承辦遲
延各員及歷任撫藩免其查議得旨已奉明旨尙敢冒瀆近來各
省大吏往往敢於煩瀆皆因朕閒緣一二事實係真情俯如所請
遂皆視爲故常殊覺可惡此摺斷難允准仍遵前旨分別議處並
將此次具詳之司道暨前署巡撫再行交部分別議處出奏之慶
廉一併察議具奏○丙申諭軍機大臣等前因杭州省城失陷臬
司段光清等藉詞接仗失利退至海甯嘉興當經降旨將該臬司
革職拏問交和春等嚴審從重定擬具奏昨據徐有壬將段光清

奏報轉遞所稱失守情形種種不符顯係事後藉詞掩飾復經降旨交和春等一併嚴訊本日據瑞昌等三月初二日專差齎遞一摺內稱賊於二月二十七日卯時用火藥轟坍城身夏寶慶之勇類與賊通佯爲敗退以致闔城兵勇同時潰散又二十八日漢城四面火起段光清等早已縋城逃走各等語兵勇通賊首先潰退帶勇之員何以毫無覺察殊堪痛恨著和春何桂清王有齡詳細查明將通賊之勇盡法懲治並將夏寶慶一併訊明正法以肅軍律至已革臬司段光清如何縋城逃走並著和春等查明與副將王邦慶一併按軍法懲辦將此由六百里各諭令知之○諭本日據何桂清等奏建平東壩溧陽先後失守蘇常情形危急一摺東壩溧陽爲蘇常門戶東壩固守數年今因建平失守遂於三月二十二三等日相繼失陷賊氛已逼近蘇常何桂清等一聞此警自

必趕緊布置力籌保全之策據奏和春等調回援浙之向奎羅熙賢二軍由湖州間道馳回宜興其熊天喜一軍及曾秉忠之長龍船亦均已調回攔剿惟程途較遠一時尙無確信且恐兵力尙單不敷剿辦見在杭湖各邑均經克復杭城有張玉良一軍駐守加以米興朝李定太等軍足敷搜捕所有饒廷選一軍由江西援浙據報已於二月二十八日啟程本日慶端奏援浙之閩兵三千亦已啟程著何桂清等飛咨瑞昌張玉良如浙江已可無須添兵卽由何桂清分撥進剿迅圖克復東壩溧陽勿令闖入腹地至金陵已合長圍攻剿正當喫緊何桂清已飛咨和春欲請張國樞帶兵赴援仍著和春酌量情形必有謀勇兼優之人可代張國樞坐鎮防剿方可令張國樞暫時離營布置仍回金陵大營以免困守逆匪或有意外竄出之虞所有派防東壩各員弁著和春等查明參

奏其建平溧陽等縣城內文武下落並著何桂清等查明具奏將此由六百里加緊各諭令知之○諭慶端奏派兵援浙並請添調勁旅助剿一摺浙江省城於三月初三日克復臨安及湖州被陷各邑亦已先後攻克惟廣德州仍爲賊踞浙中防剿尙屬喫緊所有慶端派出援應之閩兵三千名著卽催令前進於行抵浙境後聽候張玉良調遣其餘調撥之臺灣等處兵勇均可無派往卽著飭令歸伍廣潮等勇亦可無庸雇募以免糜費至浦城及仙霞關等處應如何酌留兵勇嚴密設防仍著該督察度情形斟酌辦理所請添調江西官兵赴浙之處著毋庸議將此由六百里諭令知之○壽安固倫公主薨○丁酉 上臨故壽安固倫公主第賜奠○幸圓明園○如皇貴太妃薨 上臨視醢奠○諭內閣僧格林沁等奏辦理要工動用各款請免造報一摺僧格林沁等上年辦

理各處工程除動用捐款外其不敷銀八萬三千六百餘兩准其陸續勸捐歸補此項經費並著免其造冊報銷○僧格林沁等奏洋船於上月三十日牽帶米船三隻一併駛至大沽海口在攔江沙外停泊後將米船放回該洋船卽向東駛去奏入諭僧格林沁扼要防守○戊戌 上詣吉安所 如皇貴太妃金棺前醑奠○上還宮○諭軍機大臣等前因傅振邦軍營需餉甚亟當諭令山東河南山西陝西撥解月餉酌搭舊欠以資接濟並著山東河南就近各籌銀四五萬兩先行撥往茲據傅振邦奏各路餉銀仍杳無音耗開年已經三月各營兵勇尙未發足一月之餉馬匹大半倒斃亟應籌解購補且苗練大隊見已調齊此數萬之眾一經缺食尤屬不堪設想等語見在傅振邦一軍直擣賊巢甚爲得手方期乘勝前進迅掃賊氛豈可因待餉停兵坐誤事機著文煜慶

廉英桂譚廷襄仍遵前旨各將應解月餉按月如數撥解各將舊欠一併籌撥並著文煜慶廉督飭藩司先行籌撥銀四五萬兩就近迅解傳振邦軍營不准空言搪塞儻再仍前玩泄貽誤軍行惟該撫及該藩司是問決不寬貸將此由六百里各諭令知之○予貴州陣亡知縣江鈺等祭葬世職○己亥 上再臨故壽安固倫公主第賜奠○諭軍機大臣等瑞昌等奏浙境肅清衢防喫緊分兵援應並截畱兵勇一摺官軍克復長興後四安鎮賊匪望風逃遁我軍跟蹤追剿直逼廣德距城三十里之界牌浙境已就肅清惟另有股匪竄擾江西之南豐新城逼近貴溪距廣信止百餘里賴有平江水師轟擊逆匪不能徑渡沿河南岸雙港一路進逼鉛山縣城復由廣豐竄至江山縣境此股逆匪蔓延各處衢州防堵固屬喫緊但昨據何桂清等奏建平東壩溧陽先後失守蘇常亦

形危急當諭令和春等飛咨瑞昌等如浙江無須添兵所有饒廷選一軍及援浙閩兵三千名卽由何桂清等分撥進剿今瑞昌等已飭向奎一軍前赴高滄東壩其閩兵三千擬畱守江山李定太所部兵勇又經飭赴衢州饒廷選見住衢州其兵勇已撥往江西周天孚等已帶兵回援甯國所有攻剿廣德州兵力是否足敷該處爲由皖入蘇浙要路該將軍等仍當咨商和春何桂清察看賊勢緩急酌量調度毋得顧此失彼至克復杭州出力滿漢文武員弁兵丁及團勇等業經降旨令瑞昌等覈實保奏見在浙境肅清所有追剿出力之將弁等准其一併保奏候朕施恩將此由六百里諭令知之○諭本日據譚廷襄奏探聞捻匪孫葵心由鄭州榮陽竄至鞏洛主意窺伺陝境已入由豫至秦大路所過賊數蔓延十五里勢若燎原見添派省兵三百名馳往函谷關扼要守禦兵

力單薄將西安備調之駐防營馬隊一千名調往堵禦並飛咨提督經文岱親行督兵前來辦理防堵等語此股捻匪欲由河南地方竄入陝境勢甚鴟張勝保等督辦河南剿匪事宜何以豫省沿途不能堵截任令竄擾鄰境著勝保等迅撥精兵飛速截剿毋令闖入陝境如勝保督兵出省卽畱關保防守河南關保督兵追剿則勝保畱住河南所需糧餉著慶廉源源接濟至山西與河南壤地毗連該捻聲言入陝暗窺晉省亦意中事儻賊勢北趨懷慶一帶亦著勝保等相機截剿以保完善之區設或遷延貽誤致捻匪蔓延山陝勝保等不能當此重咎也將此由六百里加緊諭令知之○諭寄諭山西巡撫英桂據譚廷襄奏探聞捻匪窺伺陝境由鄭州滎陽竄至鞏洛並孫葵心已入由豫至秦大路所過蔓延十五里勢若燎原該署撫添兵防堵本日復諭令勝保等分兵追剿

矣惟聲東擊西賊匪慣技咸豐三年懷慶解圍後賊由濟源直趨垣曲蹂躪晉境茲捻蹤已近懷慶該處毗連晉省亟應調兵防堵所有前諭備調官兵二千名業據該撫覆奏照數挑齊按日操練派定守備清山等分起管帶卽著飭令原揀統帶之副將穆騰額等督兵馳赴澤潞一帶擇要駐紮一聞匪蹤逼近卽行悉力遏截勿令擾及完善之區致蹈從前覆轍將此由六百里諭令知之○諭沈兆霖奏請就黃河改道勸捐築隄錄出前人奏疏並將東省原寄圖說呈覽一摺據稱歷來河流皆以北行爲宜乾隆年間吏部尙書孫嘉淦請開減河入大清河一疏言之最詳所謂入大清河由利津入海卽是見在黃河所改之道詢之東省官紳俱云張秋以東自漁山至利津海口皆築民堰惟蘭儀之北張秋之南則黃河自決口而出汎濫汪洋工程最鉅直隸之東明長垣山東之

荷澤鄆城培築又較張秋爲易張秋下游至海門不必施工惟缺
口至張秋數百里間可令民間捐貲籌辦各等語係爲通籌大局
起見著恆福黃贊湯文煜慶廉各就地方情形悉心酌議覈實勘
估如果事屬可行卽勸諭各該處紳民力籌捐辦並遴派熟諳河
務之大員會同各該地方公正紳士妥爲區畫或應開引河或應
築隄埝分別相度一面勸諭捐輸將來民捐民辦均著紳董經理
毋許假手委員吏胥以歸撙節如果輸將踴躍卽可於本年霜降
水落時奏明一律興工並著各該督撫將有無窒礙情形先行審
度具奏總期爲民捍患節經費而順輿情沈兆霖原摺及錄呈孫
嘉淦奏疏均著鈔給閱看將此各諭令知之○予浙江學政張錫
庚子殉難知縣恩然祭葬世職○庚子和春奏賊匪竄擾建平東
夏分股直犯東壩維時瀉壩兵勇空虛勢不能支建平東夏防兵

因腹背受敵餉道中斷遂於二十一日失守東壩亦於次日潰防
該逆遂卽竄犯溧陽總兵劉季三帶兵馳援行抵張渚探知溧陽
城外四面皆賊不能前進至初更時溧陽城池失陷劉季三以宜
興荆溪屏蔽蘇常卽於二十四日親至縣城督同地方官擇要紮
營以防竄突查溧陽爲蘇常門戶此處爲賊所踞卽可直達蘇常
臣已檄調駐紮揚州之總兵馬德昭帶兵一千名參將艾得勝帶
兵五百名馳赴金壇防勦惟常州爲南北水陸要道糧臺又設立
於此疊據何桂清函稱彼處防兵僅有浙江撫臣王有齡部勇一
千名及浙江撤回之新勇二千名調赴金壇之參將周天孚所帶
兵勇一千八百名均道出常州亦卽截畱防守尙有調防杭州之
副將馬占葵一軍二千人正在飭回揚州臣亦函致何桂清就近
迎提暫畱常防又將援浙之總兵張玉良所部兵勇二千四百名

飭調赴常援剿何桂清欲請張國樑親自赴援無如金陵各營征調已空見存兵數僅敷守禦營牆適又連接西路探報拏獲奸細供稱賊目僞侍王僞忠王等帶領大股賊黨已至高淳欲由溧水以至金陵圖解洪逆之困東西梁山金柱關等處亦報有江北匪船接續南來志在合併攻突張國樑連日親自督兵移營築牆掘濠夜以繼日惟恐不及實有萬難分身之勢見聞賊勢趨重宜荆一路金壇稍鬆不得已又改派馬德昭統帶所部馳援常州並派張國樑親兵三百名赴援又續調揚州兵勇二千名徑赴常州聽候何桂清調遣此時金陵兵力實已無可再分惟願常郡能固守待援金壇藩籬不至決裂各路援師雲集尙可力挽艱危臣調度疏忽未能先事豫防實有應得之咎請旨交部議處其畱防統兵員弁未能實力堵禦致賊內犯腹地連陷數城容俟查明另行參

奏 上諭內閣和春奏建平等處失守自請議處一摺廣德逆匪竄擾建平三月二十八日以後官軍與賊晝夜鏖戰將賊匪所造浮橋旋搭旋毀復有浙西回竄之賊益以皖南江北新到各匪我軍寡不敵眾遂於二十一日失守東壩溧陽相繼失陷軍官防守建平東壩已閱數年此次雖因賊眾兵單致被竄陷究屬防守不力咎無可辭和春著交部議處其各防統兵員弁未能實力堵禦並著和春查明卽行參奏該大臣務卽嚴飭將弁迅圖克復將此股逆匪悉數殲除毋令闖入腹地○諭軍機大臣等建平東壩溧陽先後失守蘇常門戶洞開前經何桂清奏報已諭令該將軍等迅圖克復力保腹地常州爲根本重地到防兵勇已有三千八百名續調之馬占葵等兵尙有四千餘名又續調揚州兵勇二千名各項兵勇到齊著卽由何桂清就近調度力籌堵剿遏其分竄蘇

常之路見又探報賊黨有由溧水圖撲金陵之說東西梁山金柱關等處亦有江北匪船接續前來張國樑自未便遽令遠離著仍畱江南督兵以便布置一切至浙境雖已就肅清而廣德未復終有回竄之虞昨又據瑞昌等奏江西股匪竄至江山衢州喫緊張玉良所帶之兵能否全數調回杭州兵勇是否足敷防守和春兼辦浙省軍務務須妥籌兼顧聯爲一氣仍卽督飭各路統兵員弁一面迅攻溧陽等處以次克復一面進攻廣德兼顧浙防是爲至要將此由六百里加緊各諭令知之○諭昨據譚廷襄奏擒匪孫葵心立意窺伺陝境已入由豫入秦大路當諭勝保等迅撥精兵飛速截剿茲據勝保等奏該擒經我兵擊敗後竄赴西南已過通許尉氏縣境攻撲中牟縣城及鄭州等處地方經總兵承惠參將黃得魁帶兵追剿疊獲大勝其東路續來大股逆匪亦經關保帶

所部兵勇由周家口馳赴項城汝陽相機扼剿布置尙爲妥協匪蹤飄忽見在是否西趨山陝卽著關保探賊所向迎頭截擊毋令擾及完善之區蔓延爲患勝保卽暫畱省城居中調度與慶廉會商策應之方以期節節掃蕩另片奏捻撲項城經該縣知縣張其昆登陴守禦百計防維復總城擊賊城圍立解並汝甯府同時解圍等語所有守城殺賊之項城縣知縣張其昆及城內官紳兵練著勝保等查明保奏候朕施恩其請調伊犁錫伯索倫西丹二千助剿伊犁兵丁向不遠應征調況道路遙遠須八月間方能到豫亦恐緩不濟急著勝保仍就見有兵力相機堵剿毋得專待客兵致成坐困俟秋間夷務定局天津裁撤防兵不難酌撥赴豫所請節調伊犁西丹之處著毋庸議本日據翁同書奏全營缺食河南應解協餉久未解到積欠至十萬五千兩之多前據瑛瑩咨委解

銀二萬兩該撫委員迎提豫省尙未起解請飭全數迅撥等語翁同書一軍待餉孔亟飢潰堪虞何以將已經報解之款又復遷延不解著慶廉督飭藩司將前項銀兩速令起解並將欠解翁同書月餉全數籌撥毋許延誤將此由六百里諭令知之○諭據張芾奏請飭楊載福將韋志俊一軍仍調回水營隨時簡練以收實效等語義勇韋志俊經楊載福派令赴浙計自東流由徽入浙程途較遠見在浙省援軍雲集足敷勦辦所有韋志俊一軍自可毋庸派令前往著楊載福卽飭韋志俊仍回水營認真訓練以資攻勦將此由六百里諭令知之○辛丑諭內閣吏部等衙門奏遵旨分別議處一摺前因惠親王等於武英殿郎中寶齡等承辦紙張價值議請變通未加詳察當派瑞華等復行查驗降旨將惠親王等分別議處茲據吏部會同宗人府議以降五級調用毋庸查級議

抵惠親王恭親王奕訢加恩著毋庸開所兼職任缺照例折罰職任全俸十五年抵免降調工部尚書文彩並著加恩改爲革職畱任○壬寅諭軍機大臣等前因和春奏賊陷建平等處派兵堵剿情形當諭令各項兵勇到齊由何桂清就近調度力遏分竄蘇常之路茲據何桂清徐有壬奏賊匪已於三月二十五六等日由溧陽徑竄常州因沿途民團截擊退踞陽溧埠宜興荆溪敗匪復竄踞張渚鎮見籌防守剿辦等語此次檄調援常各軍據和春前奏約有九千數百名計可陸續馳到又有曾秉忠師船三十隻諒已足數分撥張國樑因金陵布置喫緊未能遠離張玉良一軍如能趕到即可迅速掃除但江西賊匪欲竄衢州杭城防守又形喫緊萬一張玉良不能前來卽著和春調鄭魁士由溧水赴常州督兵較爲近捷王有齡准其暫畱常州協同該督守禦俟張玉良或鄭

魁士到常卽行馳赴浙撫新任其未到之馬占葵等所帶各兵並著飛催前進何桂清惟當就見有兵力先除陽溧埕股匪由宜興金壇以次掃蕩規復溧陽等處毋令蔓延其無錫等處入蘇州要路卽著徐有壬嚴密堵守爲要何桂清見籌防剿事宜未遑兼顧夷務著傳諭辭煥遇有緊要夷情卽由該藩司單銜馳奏以免稽延或和議未安必須該藩司北來卽著該督飛飭沿途地方妥備夫馬以便趨程前進不至遲滯將此由六百里加緊各諭令知之

○諭勝保慶廉奏督辦民團派委得力大員實力舉行並將所擬章程告示呈覽一摺豫省捻氛肆擾兵力不充自應舉辦團練以固疆圉經該副都統等酌定章程變通辦理尙屬妥協著卽照所擬舉行並派委在籍五品頂帶前順天府府尹宗元醇記名道趙書升記名知府傅壽彤分赴歸陳兩府實力興辦並飭南汝光道

鄭元善汝甯府知府祁之銓等帶領委員會同各州縣分別段落前往布置務使眾志成城戰守兼資以免有名無實並著隨時察覈如有窒礙難行之處量予疏通儻該委員等辦理未善亦卽嚴加參辦至團丁調營後酌給軍火糧草著卽設法籌捐辦理惟團丁等更番調營所領糧餉易滋流弊儻不覈實支發恐團丁不服難期得力著勝保等嚴飭該委員等實用實銷不得絲毫冒濫仍按月造冊報部以備查覈另片奏派兵於直豫交界力顧河防等語所有大名道聯捷派撥防兵六百名卽著長駐蘭儀上店柳園河口其餘四百名仍畱直境開長等處其自柳園口以上各口岸責成參將穆特布會同道廳嚴密巡查與直隸防兵聯爲一氣遇有緩急互相策應毋得專談諸直隸防兵儻該匪由蘭儀等處北竄惟勝保是問所有直隸出境防兵應需口糧本日已諭恆福按

例支放如有不敷亦應自河南籌款協濟勿分畛域將此由五百里諭令知之○癸卯署四川總督曾望顏奏蒲江縣城收復敘永廳屬地方肅清○以四川名山陷曾望顏下部議處○予四川陣亡教諭羅策等祭葬世職○甲辰諭內閣前據給事中李培祐以曾望顏任性妄爲聲名狼藉臚列十二款參奏當交樂斌會同譚廷襄查辦茲據該督等查明各款虛實情節分晰覆奏如原參濫保軍功一款據稱咸豐七年間豫匪竄擾陝界曾望顏調兵防剿均有斬擒奏報情節尙無鋪張其添保及刪除各員亦尙平允惟同知張兆蓉一員雖非遇賊先逃究無顯著勞績曾望顏將該員請賞換花翎殊未允協至商雒防堵一案用銀止六萬四千有奇原參所謂防堵爲日無幾銷銀一百餘萬係屬傳聞之誤前任商州知州唐李杜支應兵差有應行找領銀兩及繳還長支銀兩並

無找給銀七百餘兩及委沈壽嵩調停之事至沈壽嵩於官錢局未改章程以前曾節欠銀五千四百餘兩除收清外短銀三十餘兩亦經還訖此外並無向官錢鋪借用銀兩之事曾望顏之子報捐郎中曾捷魁有查拏賭之事原參所稱與各官宴會往來招權納賄均無實據委員長起赴漢中辦理釐捐因與南鄭縣知縣蘇鼎甲言論未協致滋事端別無藉差滋擾情弊長起之父伊綿阿原係漢中鎮總兵長起出省後家人送眷至漢中賃房居住就近支領廉俸亦無擾累百姓之處實難縣知縣王昌穀平日居官尙無不洽輿情之處統鎮刁民聚眾拆毀土行一案亦係愚民圖免抽釐恃眾滋事並非官吏差役勒索激成惟該縣於此案因曾望顏函示僅將自首三人枷號完結不免草率至買空賣空久干例禁曾望顏曾經出示通衢並札行各屬一體嚴禁嗣經推廣釐

捐並未實力申明前禁臨潼縣知縣張舒萼因前代沈壽嵩籌墊
捐項銀五百兩業經沈壽嵩給還適在該撫赴京之前致有訛傳
原參沈壽嵩勒派程儀張舒萼送銀一千實無其事前署鳳翔縣
知縣封錫蒲相驗命案未及詳報卽行卸事並非諱匿曾望顏先
以玩視人命奏參革職後經查知追悔旋請開復並非封錫蒲鑽
營亦未抑勒馬綸篤檢舉其令沈壽嵩函致已革鳳翔府知府王
炳勳聲請更正亦非私情請託澄城縣知縣梁際殷於監生韓貽
孫呈報竊案亦經批准詳報曾望顏因伊叔韓瑞東飾詞控告遂
以該縣匿報盜案奏參革職未免急遽惟賊已逾貫該縣旣未親
勘又未緝獲正犯亦難辭咎曾望顏並無挾嫌情事至曾望顏原
保沈壽嵩摺內均有實在事迹且案經藩臬兩司會詳亦非該署
督平空保奏其沈壽嵩兩次所得保舉均係特旨獎勵並非該署

督擬議聲請除前任商州知州唐李杜等均著無庸置議外陝西候補同知張兆蓉雖因受傷突圍而出究屬失於應援所有原保花翎著卽撤銷仍畱藍翎免其查議委員候補通判長起雖無挈眷同行滋擾地方之事惟委辦釐捐接畱眷口足見以官爲家不過希圖分潤況會辦釐捐未能明白勸諭更屬草率寶雞縣知縣王昌穀會辦釐務未能消患未萌僅將自首三人遷就了結實屬辦理失當均著交部分別議處署鳳翔縣知縣封錫蒲雖非有心諱匿命案第漏未造冊移交後任致書吏歸入已結卷內實難辭咎業經曾望顏奏准開復仍交部另行議處已革鳳翔府知府王炳勳原稟鳳翔縣命案止敘訪聞飭訊緣由並未請參曾望顏遽以誤揭屬員附參王炳勳業經另案革職所有前參降一級畱任處分著卽註銷澄城縣知縣梁際殷雖無諱盜情事而於事主報

縣之初既未親往勘驗迨今四年之久又未拏獲賊亦屬咎有應得著開復原參諱盜處分仍照例議處陝西巡撫見署四川總督曾望顏雖訊無贓私重情惟舉劾屬員多有草率錯謬且明知其誤仍不檢舉又令伊子查街拏賭干預公事致招物議實屬不自檢束著交部嚴加議處西安府知府沈壽嵩於官錢局改定章程以後並無交易虧短情弊惟於曾望顏誤參封錫蒲諱命一案尚未深悉是否王炳勳誤揭輒因曾望顏面諭卽行函令更正事雖因公究屬不合著交部議處○諭軍機大臣等瑞昌張玉良奏衛防喫緊蘇常戒嚴縷陳分兵援應各事宜一摺賊匪由江西窺浙常山江山已有賊蹤情形實屬喫緊瑞昌等業已挑選練勇派員管帶分起赴衛聽候饒廷選調遣著卽責成該鎮實力堵剿毋稍疏失儻兵力實有不敷准其招集民團助剿至已革臬司段光

清既據瑞昌等奏稱於沿江一帶情形尙爲熟悉著准其暫行派往衢嚴會同饒廷選商辦防剿俟有人接手卽遵前旨拏問江南自溧陽東壩失陷蘇常萬分危急惟俟援浙各師回軍剿辦昨已諭知和春等浙省衢防喫重如張玉良不能折回卽令鄭魁士由溧水赴常州督剿仍畱張玉良督辦浙江軍務著瑞昌等酌量情形辦理見在熊天喜等駐紮界牌等處卽著瑞昌張玉良督令相機進攻廣德之賊不得徒事株守王有齡赴援常州已准其暫畱該處俟鄭魁士到後再行赴任所有省城善後事宜並著瑞昌等妥爲籌畫隨時具奏將此由六百里諭令知之○諭本日據英桂奏探聞擒匪竄至鞏洛意圖西犯派委員姚慶布等帶兵二千名分布砭石驛茅津渡等處駐紮以防西竄惟晉兵夙非勁旅恐不足恃該省東南各州縣多與豫省接壤若派兵常川防堵則經費

難支旋撤旋防又疲於奔命且各屬距省較遠聞警調兵更有鞭長莫及之勢請飭勝保於豫省扼要截堵各等語晉省著名富庶久爲捻逆所垂涎該省官兵未經戰陣恐未可恃自係實在情形勝保督辦剿匪責無旁貸不得任其竄擾鄰省著勝保慶廉探明匪蹤所向卽派兵繞前截擊毋令闖入晉疆徒成尾追之勢將此由六百里諭令知之○諭前因捻匪有窺伺陝省之意恐其聲東擊西旁竄晉疆已諭令英桂將前次備調兵二千名赴澤潞一帶防堵茲據該撫奏稱探聞捻匪竄至鞏洛與晉省壤地毗連見於陝州之硤石驛及茅津渡東灘渡封門口等處各派兵五百名扼要布置河東運城地方亦派省標五百名馳赴防守所辦尙屬周妥惟賊蹤飄忽靡常難保不於無兵處所折竄該撫卽飭地方官勸諭民間舉行團練以壯聲威並調大同鎮官兵到省聽候調遣

偵探何路告警卽派兵由何路迎擊以期力保完善之區是爲至要將此由五百里諭令知之○諭前據給事中李培祐奏參曾望顏各款內有該撫查閱營伍時攜帶伊子曾捷魁同行經過地方每處封送曾捷魁銀二十四兩及三十二兩不等名爲少爺茶敬當諭令樂斌會同譚廷襄查辦茲據奏稱已據署韓城縣知縣楊廷翰等稟稱曾望顏家丁張姓有藉端需索情事至曾否與曾捷魁另有牽涉請飭查訊等語家丁張姓兄隨曾望顏赴川著崇實提訊究辦曾捷魁有無沿途收受茶敬之事一併查明懲處毋稍徇隱樂斌等原奏著卽鈔給閱看○此由五百里諭令知之○杭州將軍瑞昌等奏賊陷德清武康二城均經收復報聞又奏衢防喫緊請飭段光清前赴策應得旨以革司雖於地方情形熟悉惟恐自知罪重焉能更望向前○予安徽陣亡副將榮陞祭葬世職

○乙巳諭軍機大臣等勝保等奏請調西安馬隊赴豫助剿等語前因捻蹤西竄經譚廷襄撥西安馬隊一千名防守函谷關茲勝保等奏請借撥五百名俟伊犁餘丁到豫將此項馬隊撤回原營惟勝保等前請調伊犁餘丁並未准其調撥此項西安馬隊一經借調卽難遽行撤回見在陝省防務緊要已屬兵力不敷分布勢難再行出調況添兵卽須添餉河南欠解各省軍餉甚多見又辦理民團須籌經費何得屢請征調不顧餉需所奏著毋庸議將此由六百里諭令知之○准丁憂河南按察使周士鎰暫畱勝保軍營差委○丙午諭軍機大臣等前因翁同書以餉需不至兵勇飢濱堪虞請於北路協餉外另撥江西省銀數萬兩當交戶部速查皖餉分別嚴催具奏茲據該部奏稱江西月解曾國藩軍營餉銀六萬兩徵防軍餉八萬兩再令協濟皖北力有未逮應毋庸議並

據查明皖北軍餉自九年正月爲始截至本年三月止山西欠解銀五萬八千兩陝西欠解銀三十三萬五千兩河南欠解銀十二萬五千兩請飭嚴催等語山西等省應解皖北協餉積欠甚多以致翁同書軍營兵勇枵腹荷戈軍情岌岌設因糧絕潰散大局何堪設想著英桂慶廉譚廷襄務將應解皖餉按月如數解往其以前積欠著限於半年內陸續解清毋得仍前延宕儻再任意稽延玩視軍需致誤大局惟該撫藩等是問決不寬貸將此由五百里各諭令知之○命曹澍鍾馳往四川辦理軍務以劉長佑爲廣西巡撫張凱嵩爲廣西布政使華日新爲廣西按察使由右江道遷○何桂清王有齡奏該逆自退踞陽溧埠之後續到大股三四千人在該處搶築營壘賊黨四出焚掠閏三月初一日大股竄至離城二十里之原圩地方當派已革總兵蕭知音等出隊協同民團迎剿

水陸並進行至距原圩三里地方該逆豕突而前我軍槍礮齊施
鏖戰三時之久殺賊四五百名總兵馬德昭等揮兵齊進將賊截
爲兩段賊眾大亂我軍合力衝擊生擒賊匪六十餘名殲斃三四
百名自相踐踏落坑墮水者不計其數追殺四十餘里直抵陽漂
埠將前路一帶賊巢盡行奪毀時遊擊曾秉忠等長龍三板船由
僻港繞至陽漂埠之後舍舟登陸距陽漂埠里許出其不意飛奔
喊殺該逆倉卒出拒相持不及一時之久敗退入巢我軍四面環
攻該逆支持不住卽時奔潰隨將後路賊壘十餘座一律踏平餘
匪遁向宜興豐義一路而去時已薄暮陸軍當卽收隊曾秉忠等
船隻直抵豐義湖邊並由西北黃家橋截其旁竄乘賊喘息未定
兩路兜擊又斃賊二百餘名該逆無心戀戰四散奔逃水軍追過
距豐義十里之觀莊地方始行收隊見接總兵熊天喜來稟廣德

州已於三月二十八日克復參將羅熙賢一軍不日可抵宜興卽飭總兵劉季三會同羅熙賢將宜興城守事宜布置妥協卽由西鄉節節掃蕩爲規復溧陽之計其圍攻金壇之賊於初一初二等日連次撲犯均經副將劉成元等擊敗回巢初二夜劉成元等各帶隊伍銜枚疾走分攻賊營逆眾傾巢出拒我軍鏖戰經時殺賊無數該逆紛紛潰退向西路狂竄當將沿城賊壘一律平毀至金壇西路係寶堰大茅山白堍一帶地方與丹陽句容丹徒接壤句容業經和春派兵防堵丹陽甚屬空虛臣等見已派兵馳往防守其丹徒寶堰地方仍咨和春酌量撥兵堵禦再見在常州軍情已有轉機浙江籌防喫重臣王有齡拜摺後卽行起程馳赴新任報聞○丁未諭軍機大臣等本日何桂清等奏溧水失守通籌防剿情形一摺據稱三月二十八日溧水失守大股逆匪與金壇之賊

併竄紅山地方距白塊僅十餘里請將常鎮諸軍就近暫歸張玉良節制等語白塊地方上通句容下達丹陽並可直抵鎮江設該逆分竄則大營後路爲賊所包於大局甚有關繫句容雖經和春派兵防堵而丹陽鎮江空虛實甚何桂清見派副將向奎馬占葵等統帶兵勇先赴鎮江並飛催熊天喜率廣德得勝之師由常赴鎮一俟趕到再令馬占葵一軍扼守瓜州以通大營至蘇常之水路派已革總兵蕭知音等帶領兵勇並舢板船隻馳往丹陽一路以通大營至蘇常之陸路布置尙屬周妥惟溧陽尙未克復金壇之匪有回竄之信宜興西北各鄉賊氛尙熾當此逆匪環逼何桂清所派各軍是否足敷防剿著和春張國樞體察情形趕緊將大營後路妥爲布置毋令該逆分竄丹陽鎮江等處逆匪欲由豐義直撲常州該處防務未可稍涉大意所有總兵馬德昭等兵勇自

應一併暫畱常州調遣張玉良已到常州著暫畱江蘇節制諸軍一切防剿機宜仍隨時咨商和春張國樑務令聲勢聯絡不可顧此失彼將此由六百里諭知和春張國樑何桂清並傳諭張玉良知之○戊申諭軍機大臣等前因捻匪窺伺陝境恐其旁竄晉疆當諭將前備調官兵二千名飭原揀統帶之副將穆騰額等帶赴澤潞一帶擇要扼紮旋據英桂奏已於太原大同二鎮挑選官兵並於省標派兵分防要隘以杜竄越本日據僧格林沁等奏請調山西備調官兵赴防等語山西毗連陝州等處既據該撫派兵嚴防並另挑太原大同兵二千名赴省聽候是分布之兵尙可敷用所有前諭備調官兵二千名著英桂卽飭穆騰額等統帶配帶撞槍烏槍馳赴津郡聽候僧格林沁調遣毋稍遲誤將此由五百里諭令知之○諭前因楚省各軍分道入皖攻剿喫緊之時以得力

勦軍分撥赴浙恐兵力空虛當諭令蕭翰慶所帶之衛勇義勇仍
留楚省爲入皖剿賊之用茲據張芾奏浙西敗匪竄至建平一帶
甯國府情形危急並浙東又有賊氛徽州防務增嚴請暫留援浙
楚師等語江西股匪由鉛山等縣擾及浙江邊界與徽屬歙休婺
源毗連並窺伺歙南之連嶺歙嶺見在甯國緊急徽防又以浙東
有警多所牽掣淳安竄賊飄忽靡常自應亟籌埽蕩勿致蔓延所
有蕭翰慶一軍著准其留於張芾軍營卽飭令進攻旌太涇縣速
解甯國之圍以保全皖南大局另片奏請飭曾國藩督辦皖南軍
務等語曾國藩見在安慶剿辦賊匪皖北情形喫重其所部得力
將弁調撥至他省辦理防剿事務者亦已不少若將曾國藩調往
皖南恐所統各軍無人接管所有皖南軍務仍著責成張芾督同
周天受認真辦理相機籌畫以期事權歸一迅埽賊氛毋庸輕議

更張至各營積習務須力爲整頓不得因難推諉日就廢弛將此
由六百里諭令知之○己酉諭軍機大臣等本日據瑞昌奏賊蹤
移竄嚴屬杭省又形危急請飭撫鎮回援並逆匪由分水竄踞昌
化縣城各摺片逆匪大股由開化之華埠竄出於三月三十日竄
入遂安又分股撲擾淳安竄踞昌化縣城大肆焚掠該縣水陸交
通逼近杭郡自應亟籌防剿見在王有齡已啟程赴浙省城一切
守禦事宜自可與該將軍周密布置惟杭州甫經收復人心未定
存城兵勇不過五千實形單弱復無得力大員統帶甚屬可虞張
玉良因蘇常告警業已馳赴常州見在該處情形稍鬆自應先其
所急著和春等卽飭張玉良統帶兵勇迅速折回杭州救援竭力
堵禦毋令賊蹤再行闖入復肆蹂躪以保省垣重地前諭和春調
鄭魁士由溧水赴常州督兵較爲近捷儻鄭魁士或因老病未能

獨當一面著和春體察情形另派得力大員前往節制諸軍妥爲
勦辦何桂清身任總督一切防勦機宜亦可就近調度務須督飭
諸軍趕緊將溧水建平東壩等處克復毋令窺伺腹地致滋蔓延
以保全東南大局將此由六百里加緊諭知和春張國樞何桂清
並傳諭張玉良知之○諭瑞昌奏逆匪由開化進竄遂安又分擾
淳安嚴州防務喫緊旋復竄踞昌化杭城又形危急本日本已寄諭
和春等並傳諭張玉良迅速回援王有齡於本月初五日起身計
已馳抵省垣著卽與瑞昌妥籌布置固結人心示以鎮定一面嚴
密防守一面遴派得力將弁在城外紮營扼要截擊不得如羅遵
殿株守省城致蹈覆轍瑞昌見調李定太節制各軍該員前次赴
援杭州遷延不進並聞所帶兵勇到處騷擾似此庸懦之員恐難
勝統率之任見在衢防較鬆張玉良未到以前卽可令饒廷選暫

有節制各軍仍嚴飭李定太約束兵勇奮力剿賊儻再觀望不前
卽行從嚴參辦並飭布興有管帶礮船嚴防江路毋許疏懈省中
鄉勇僅止五千朕聞兵勇多有通賊之事此次瑞昌所奏卽有土
匪潰勇爲賊先導等語必須查明各勇如有通賊情事卽正法數
人以儆其餘該將軍等奏稱遂安被賊竄入城池是否失陷及昌
化失守情形文武各官下落著瑞昌王有齡迅卽查明據實具奏
將此由六百里加緊諭令知之○予貴州陣亡知州楊承照祭葬
世職建祠○庚戌和春奏賊匪圍攻金壇壘經副將劉成元等擊
敗該逆於閏三月初三日焚巢而遁金壇城外已無賊蹤先是臣
以該逆既竄金壇勢必謀犯句容阻我餉道因派副將梁克勳帶
勇一千名前往駐紮閏三月初三日梁克勳甫抵句容縣城卽見
有官兵旗號由西南來者疑是後隊踵至未及盤問該逆遽擁直

進立即喊殺兵民猝不及防由北門退出城遂失陷查句容爲六
營糧餉所必經且又接壤丹陽鎮江並可旁竄常州實爲扼要之
地茲已續派副將張威邦帶兵三千名由清化鎮一帶相機前進
何桂清亦派已革總兵蕭知音副將向奎等分帶兵勇馳赴丹陽
鎮江會同剿守其廣德之賊經總兵熊天喜由四安帶兵進剿紮
營於浪宕橋將撲營之賊擊退三月二十八日我軍四路進攻該
逆離城二三里列隊迎拒熊天喜等左右兜擊截其回城之路該
逆紛紛奔逃熊天喜即督蔡致貴等分布雲梯直上砍倒守城賊
匪數人餘逆驚潰我軍魚貫畢登其時已革總兵米興朝由東庭
湖督兵鈔襲經歷凌蔚臣等馬步各隊由南門直入熊天喜所部
入自東門會同搜剿城內匿匪悉數殲除當將廣德州城克復惟
是建平縣匪仍有回犯之虞甯國旌德未復山路仍可竄入浙西

臣因賊匪竄犯常屬腹地又旁陷句容繞出大營之後不得不先其所急飭令熊天喜帶同劉成元羅熙賢各軍馳赴丹陽鎮江聽調所有防守廣德事宜卽飭米興朝所部二千數百人駐守張玉良見已馳至常州所有常鎮諸軍均歸總統以一事權見在援師漸次調集各路鎮將如能先復句容進解溧水之圍大局可望立轉臣惟有竭力圖維兼籌並顧斷不敢稍存大意所有克復廣德及金壇解圍出力員弁等容俟查明再行奏請恩施陣亡之把總王得魁王得均應請飭部從優議卹其未能察出假冒官兵以致句容失陷之副將梁克勳應請旨卽行革職畱營隨剿以觀後效上諭內閣據和春奏克復廣德州詳細情形卽著嚴飭米興朝駐守該城以次克復建平等縣毋令蔓延所有此次出力及金壇解圍出力之員弁兵勇著和春會同何桂清查明保奏陣亡之把

總王得魁王得均著交部從優議卹副將梁克勳經和春派往防守句容逆匪假冒官兵旗號蠱擁直進該副將未能察出以致句容失陷殊堪痛恨梁克勳著卽革職仍畱軍營責令隨剿並著和春等飭令張威邦等帶兵扼剿迅圖克復○軍機大臣會同內務府大臣審訊太監張府私藏軍器並知情不舉各犯分別定擬得旨張府著卽處絞○辛亥諭內閣吏部具題遵議禮部漏檢科場條例之堂司各官處分此係嚴辦科場案內之事禮部初次奏摺實屬含混迨經特派會同覈議始行更正試問科場既有專條何得謂之漏查及自請議處又何得謂之檢舉將該堂司照徇庇例治罪亦不爲過況此係去歲秋間之事因何遲至半年之後始行具題著吏部堂官明白回奏至麟魁等處分著吏部照有意蒙混尙非始終徇隱例酌擬具奏尋奏遵擬禮部郎中壽昌等應照徇

隱例減等降一級調用尙書麟魁等降一級畱任均不准抵銷從之○諭軍機大臣等前因曾望顏奏撤任知府翁祖烈臚列八款訐告並鈔錄呈覽當經諭令崇實於行抵四川後秉公查辦茲據崇實奏行抵川省日期先將見在軍務咨詢該署督並翁祖烈原訐八款與曾望顏錄呈之件語句不符鈔錄覆文訐款各件呈覽所有督勦畏葸及武備廢弛二款雖經該署督據咨答覆仍著該大臣與原訐各條一併詳細查明秉公覈辦務期水落石出毋得稍有不實不盡至原稟八款既與曾望顏錄呈之件不符著卽照該撤任知府原稟查辦其曾望顏應行處分俟該大臣逐款查明奏結時再降諭旨將此由五百里諭令知之○諭海瑛奏署提督田興恕見督大隊由靖州拔營取道黔省之銅仁一帶分路進兵以固貴陽省垣門戶兼防粵匪惟所部兵練僅四千餘名不敷防

勦擬添募壯丁足二萬人之數始能濟事月需餉銀十二萬兩黔省斷難籌茲鉅款請飭湖南並江西湖北等省按月各協濟數萬兩由湖南湊足十二萬兩以濟田興恕軍餉等語黔省餉需支絀異常前因該署提督一軍入黔餉需不繼恐致停兵待餉諭令駱秉章設法籌撥見在該省苗教各匪竄越過江逼近省城情形危急田興恕所部兵練僅止四千餘名自應添募壯丁以資攻勦所需月餉黔省無從籌畫均係實在情形非各省力籌協撥田興恕亦必束手無策惟江西防兵尙有四萬餘名又月解曾國藩及徽甯軍餉爲數已屬不支仍恐有名無實若令楚南北月籌十二萬兩之數湖北見在分兵入皖湖南亦派兵援川援粵餉需未能充裕恐難籌此鉅款著官文胡林翼駱秉章酌量情形不必限定數目按月設法籌撥由湖南轉解總期田興恕新舊各部士飽馬騰

不至因餉缺掣肘是爲至要將此由六百里各諭令知之○以紳團協復城池永廣安徽懷遠五河臨淮鄉文武學額各二名鳳陽三名○予廣西陣亡知州積綸等祭葬世職○壬子諭軍機大臣等何桂清奏英佛二國公使投遞照會據情代奏一摺英佛二國自道光年間五口通商以來十餘年閒久歸和好從無稱兵構釁之事乃中外所共知者迨咸豐七年無故於廣東起釁八年復直犯天津經桂良等推誠開導許立條約詎上年春閒又帶兵船到津不遵理諭毀我海口防具首先背約其損兵折將實屬咎由自取並非中國失信所有八年議和條款自應概作罷論惟據何桂清奏中國與外國各商恐廢生計不願再啟兵端普魯斯亦當深知悔悟乃此次照會內仍欲事事須從原約是普魯斯尙未知悔悟該督亦無從代彼乞恩如其真心和好朕亦必體恤中外各商

允其所請然必於前議條款內擇道光年間留有之事無礙大體者通融辦理令其有以回報該國保全顏面仍須於上海定議不得率行北來儻再有兵船駛入攔江沙毀防守器具等事必當痛加攻剿毋貽後悔至佛使照會內有以軍機大臣不自行覆給照會爲簡慢之處不知道光三十年英國投文與軍機大臣穆彰阿等其時卽由兩江總督陸建瀛代爲答覆因軍機原不管通商之事此時照舊例辦理並非簡慢將此由六百里諭令知之○癸丑諭軍機大臣等據楊載福奏巡查下游江面派營堵剿情形一摺逆匪於李陽河盤踞附近山後騷擾村市並擄船欲渡北岸該提督行至池州府之鳳凰峽內港水淺礮船不能前進土橋逆匪築壘開壕水師獨攻一面難以得手見在李陽河既經楊載福派總兵李成謀等移營扼堵卽著飭令嚴密防守毋令賊匪得以偷渡

其鳳凰峽等處既未能進攻著楊載福督飭各營堵剿於沿江各要隘不時帶船梭巡與陸路楚軍互相聯絡俟胡林翼等克復桐舒移師會剿以期一鼓蕩平樅陽等處復有該匪偷載蘆柴欲運往安慶業經爲我兵焚燒仍飭李成謀等加意防範毋稍鬆懈江南見因溧水句容相繼失守溧陽又未克復得力兵勇調赴常州鎮江等處大營頗覺空虛恐金陵殘喘餘孽乘虛外竄則蕪湖安慶益形喫重著楊載福會同江南水師總兵吳全美李德麟等聯絡聲勢隨機痛剿力杜外竄是爲至要將此由五百里諭令知之

○甲寅諭內閣前因袁甲三奏副都統伊興額自陳病廢降旨革職飭令回旗茲據都察院奏安徽監生張鴻文等於未奉諭旨之前聯名赴該衙門具呈懇令該革員仍駐濰溪總辦剿匪事務等語伊興額前在軍營屢次獲咎朕因江蘇民人鄭立本等來京具

呈懇畱是以俯順輿情令其仍駐濰溪認真勦捕乃該革員藉稱患病延不前往嗣復派赴袁甲三軍營帶隊勦賊輒敢自陳病廢不能當帶兵重任是伊與額孤負朕恩並非朕棄置不用所有該監生等聯名具呈之處著毋庸議張鴻文卽交該部遞解回籍○諭軍機大臣等前因扎拉芬奏接據裕瑞函稱浩罕因葉爾羌弁兵毆斃額爾沁有帶兵前來滋擾情形當經諭令扎拉芬泰等密飭各城嚴行防範以期有備無患本日據扎拉芬泰等奏委員查稟及見擬籌辦大概情形並將夷字各件鈔錄呈覽此次浩罕派來夷使愛孜木巴巴已到喀什遞字庫孜伯克尙未進卡所遞字內詭稱毆斃額爾沁一事尙未告知浩罕伯克以額爾沁口回之事先行探聽情詞詭譎其大旨總在籠絡愚回懈我邊防然後入卡勾結羣起響應惟見在旣遣使遞字卽尙有可乘之機該將

軍等當熟籌駕馭挽回之法勿使事機卽行決裂方爲妥善著仍遵前旨一面密飭各城不動聲色嚴行防範以期有備無患法福禮前已有旨令馳往烏魯木齊署理都統茲據奏稱該麥贊大臣熟悉該處情形如浩罕稱兵須令前往統師等語著扎拉芬泰等酌量情形如果烏魯木齊相距較遠於策應實有未便卽著法福禮留於伊犁暫緩啟程前往將此諭令知之○諭前因扎拉芬泰等奏據裕瑞函稱探聞浩罕有派兵前往冰嶺等事當經諭令裕瑞等妥爲防範本日復據扎拉芬泰等奏查明額爾沁被殲情形並因接到裕瑞信函知浩罕明巴什續派夷使愛孜木巴巴庫孜伯克兩人前來卽將明巴什圖書字二件鈔錄呈覽等語額爾沁於入城筵宴後本已退去因聞燉驚駭互毆致斃該大臣等實屬未能先事審慎覽明巴什信內有自古至今並未聽見過此事因

恐伯克生氣再來騷擾地方未曾回知之語意在籠絡愚回俾知其曲在官而不在彼且欲懈我邊防一旦入卡必致羣起響應不可收拾殊屬居心叵測裕瑞等久無奏報此次該夷使等既來探信亟應設法曉諭將額爾沁桀驁滋事之處詳細告知使自知理屈以免遽開邊釁其各城回眾仍須加意安撫萬勿任令該夷煽惑致被勾結爲患一切仍與扎拉芬泰會商妥爲籌辦不得再涉疏忽致干重咎並將近日辦理情形詳細馳奏將此諭令知之○署貴州提督田興恕奏帶兵先援省城再圖分剿得旨黔省餉項匱竭汝須認真撫循威令必行勿使潰散驕惰○以嚴樹森爲湖北布政使唐訓方爲湖北按察使由督糧道遷○實授恩錫安徽按察使○乙卯惲光宸以病免以毓科爲江西巡撫調張集馨署江西布政使以裕鐸爲福建布政使莊受祺爲福建按察使降調湖北布政使

○以捐輸軍餉永廣湖北江夏學額九名武昌興國大冶江陵各
六名沔陽五名黃岡四名咸甯漢陽天門隨州光化各三名嘉魚
蒲圻孝感蘄水黃梅京山應城應山襄陽東湖恩施荊門各二名
崇陽通城通山麻城蘄州鍾祥潛江安陸監利松滋宜都南漳穀
城長陽當陽各一名○丙辰諭軍機大臣等據翁同書奏潁州兵
練擊破賊圩並截剿由豫回竄大股捻匪斬殺殆盡一摺捻逆由
豫回竄突撲潁東經潁郡兵練迎頭截剿並擊破王家海賊圩生
擒擒首申連斃賊極眾賊匪奪路回巢水陸各軍會剿斃匪無數
覓在沙河南岸一律肅清此次潁郡兵練齊心擊賊尙能以寡勝
眾不至分竄蔓延實爲得力著翁同書仍飭在潁各軍乘勝進攻
沙河北岸賊圩俟全行肅清卽會合苗沛霖練勇直搗孫逆等老
巢毋畱餘孽另片奏吉林馬隊內無馬兵丁共一百餘名皆係餘

丁新補尙爲精壯勝保處見缺馬隊擬派往豫省由勝保撥給馬匹可期得力等語本日適據勝保奏請飭袁甲三翁同書等仍派員來豫管帶馬隊著袁甲三等仍於麟瑞薩薩布善慶克蒙額德春等五員中酌量派出一二員管帶此項無馬兵丁赴勝保軍營聽候調遣以資攻剿將此由六百里各諭令知之○諭前因浙江需餉甚亟諭令慶端等撥銀十萬兩解赴浙省茲據該督等奏稱調派閩兵三千援浙需用口糧以及俸賞等項幾及七萬兩又因江右逆匪逼近建甯邵武所屬兵勇防堵需費不貲所有浙省軍餉一時未能全解見將庫存兵餉銀三萬兩儘數解赴杭州等語浙省防剿喫緊待餉孔迫閩省僅解銀三萬兩恐難敷用前據戶部奏閩省撥給浙江銀十萬兩擬由茶稅項下動用除瑞昌截留閩海關解京餉銀二萬餘兩其餘七萬餘兩儘數撥給浙江著慶

端等卽照部議撥解以資接濟毋得藉詞延宕致誤要需此次派兵三千名援浙裹帶三箇月口糧及俸賞行裝夫腳等費何以用銀至七萬兩之多當此經費支絀之時卽係照例辦理亦應量爲展減且恐帶兵各員藉此濫支濫應本日已諭令戶部查議具奏並著慶端瑞璜詳查造報毋任浮冒將此由六百里諭令知之○予陣亡河南副將桂喜等安徽主事吳觀瀾等祭葬世職通判徐貴馨祭葬世職建祠○丁巳諭內閣吏部奏遵議私罪降革分發人員不准仍分原省另議章程一摺私罪降革捐復人員均係棄瑕錄用若令其再赴原省難保不仍蹈故習貽誤地方著照所議嗣後凡有私罪降調革職捐復之員如係曾任實缺應歸部銓選者遇到班時毋許掣原省之缺其從前未經得缺例應回省人員並一概不准仍赴原省另以各省配籤分發如以上各員加捐指

省分發亦不准仍指原省儻原省係軍務省分仍以軍務省分改
指改掣以杜規避其雖係公罪情節較重者並著一律辦理各該
員等赴部報捐如不聲明降革緣由徑行指捐原省者著卽照蒙
混捏飾例覈辦所有從前業經指捐尙未引見發往各員卽飭令
於到部時按照新章呈明改指他省再行帶領引見○諭文煜奏
勇隊恃眾滋擾請將不能約束之道員革職查辦一摺山東濟東
秦武臨道黃良楷管帶步勇二千名防剿兗沂各屬經文煜奏明
令在紅花埠一帶屯紮諄飭嚴加約束乃該勇等屢有恃強搶擄
情事該道又自蘭陵擅自移營駐紮滕縣於奏明有數之勇任意
添募裁撤本月初六日該勇等在郟城縣重坊地方恣意焚掠殺
害團總紳民人等三十餘名口該道並不據實稟究反稱被該處
民團截擊殺傷並歸咎於缺糧所致顯係飾詞袒護非尋常玩誤

可比運司銜濟東泰武臨道黃良楷著卽行革職交文煜查辦其所部勇隊卽著青州營參將梁愷管帶仍由署曹州鎮總兵郝上庠統領認真約束防剿並將滋事各勇嚴拏訊辦毋任疏脫以肅軍律○諭軍機大臣等前據扎拉芬泰等奏接裕瑞信函知浩罕明巴什派夷使遞字有未曾回知伯克之語恐其籠絡愚回當諭裕瑞等將額爾沁桀驁滋事之處告知夷使並安撫回眾勿令勾結爲患茲據裕瑞等奏業已寄信浩罕申說該夷接信後先派回子於二月中旬到喀與該城阿奇木遞字探問並說與阿奇木仍然和好等情旋卽折回察其詞意向屬恭順等語夷情叵測見雖安靖難保不暗中勾結猝啟釁端又准固慶函稱浩罕派來額爾沁捏斯密頂等將到葉城遞字著俟該額爾沁前來察其情詞相機辦理並將額爾沁滋事各情詳細告知使知其曲在彼儻該夷

輸誠效順自應再加恩撫如或意存狡賴卽當據理駁斥以服其心其本地回眾先當隨時撫慰以杜勾結各邊卡嚴飭戒備以絕其窺伺之心並覓妥靠回子能深入外夷愛曼者密爲探報如浩罕有何舉動卽飛速咨商扎拉芬泰妥籌辦理裕瑞著暫緩來京俟辦理此事得有定局再行奏請將此諭令知之○諭本日據何桂清奏金陵逆援腐羣常州兵力不敷援剿一摺甯郡南陵賊匪大股一由東壩徑趨金陵一由溧陽圖竄常郡句容逆匪因聞防守丹陽悉向溧化鎮竄去江北皖南之賊併力犯金陵長圍勢甚鴟張和春欲調張玉良等同營助剿復飭熊天喜等由丹陽鎮江前進馬占葵所帶兵勇又經李若珠調回楊州見在金陵長圍攻剿正當喫緊之際自當兼顧大營後路以通餉道並嚴防賊匪鈔襲惟蘇常爲江南大局所關亦應力籌堵剿以遏賊匪分竄之路

見當賊氛環逼常州兵力實形單薄所有援常諸軍應如何調撥策應以圖萬全毋致顧此失彼著和春張國樑何桂清等和衷商榷不可偏重一處致誤事機金陵後路固宜嚴防而常州亦不可稍有失事該將軍等務當力圖兼顧相機籌辦以保全東南大局將此由六百里各諭令知之○何桂清奏本月初一日英佛兵船駛至定海衛頭地方停泊旋有夷官進城分住寺院徧貼告示雖未肆擾意在以兵脅和奏入諭何桂清悉心籌辦○命山東山西各巡撫速籌火藥一萬五千斤解赴皖南軍營備用○以續捐軍餉再永廣浙江錢塘商學額二名德清學額二名鎮海餘姚海甯山陰平湖鄞會稽蕭山秀水上虞諸暨嘉興嘉善嵰天台義烏各一名河南汝陽六名葉縣三名中牟商邱河內淮甯襄城光山各二名祥符杞縣通許尉氏鄆陵睢孟鞏新安南陽鄧內鄉舞陽上

蔡正陽新蔡羅山西華商水項城太康扶溝鄆城汝郊寶豐盧氏
固始各一名○追予安徽陣亡道員金光飭於原籍建祠並予其
祖父母父母二品封典○戊午諭內閣曾望顏奏官軍會剿猫猫
山逆匪連拔逆寨一摺四川猫猫山逆匪郎官等盤踞茶溪紅巖
坪等處築寨負隅辦理酉秀防務之綿州直隸州知州毛震壽會
同地方文武印委各員分起進剿三月十四等日連將茶溪老巢
紅巖坪險寨攻克平毀疊次斬獲甚多官軍奪險扼要駐守其獅
子巖苦竹坪張家巖各賊寨亦於十六日分路進剿各有斬擒卽
著該署督飭令帶兵文武乘此聲威速圖進取盡殲醜類○諭軍
機大臣等僧格林沁恆福奏北塘海口見有夷船二隻停泊見在
防守情形一摺此次北塘口外先後駛來夷船二隻停泊雖據稱
係俄船而既有寄京信函並不由舢板攜帶且無通事先稱僅來

大船一隻續又由南洋駛來一隻形迹可疑據稱大船上有通英
佛言語之人難保非英佛潛入俄船希圖窺伺該大臣等見已派
撥馬步官兵前往北塘駐紮以備臨時緩急之用所籌自屬周妥
北塘地方前經肅順等與俄約定如海口無事可以差人往來見
常設防之際原不應前來茲該夷舢板船已經出口如再來北塘
送信著恆福接收許其寄京如欲差一二人進京奏明請旨酌辦
該大臣務當隨機應變與恆福妥籌辦理以慰朕望至馬隊恐不
敷分撥可於山海關吉林黑龍江兵內酌調若干以資策應大沽
防兵不可掣動北塘後路及天津兵力較單應如何添兵布置之
處著該大臣斟酌辦理迅速奏明添調再昨據何桂清奏儘先守
備謝起發已由夷船放歸搭坐商船趕回津沽矣又據該督奏英
佛兵船十八隻駛至定海廳地方停泊其兵借居城內分住寺院

示欲占地屯兵難保不卽由定海駛至天津不可不嚴爲之備其
伊克昭烏蘭察布兩盟官兵本日據成凱等奏先後到城見在勤
加操演並令將疲瘦馬匹妥爲牧放矣○諭瑞昌奏逆賊竄踞分
水見籌扼堵一摺賊匪聚集分水並分股擾及於潛新城等處勢
甚猖獗據該將軍奏稱業將省城防守事宜嚴密布置並派撥官
兵扼堵入省要路與前日王有齡所奏大略相同惟賊蹤業已蔓
延分水踞賊甚眾使非急籌堵蕩勢將不可收拾李定太係債軍
之將且聞其所部兵勇到處滋擾恐難得力饒廷選因衢防緊急
復難兼顧所有省城西南一路剿捕事宜應如何添調官兵及派
委得力將弁統率以期迅殲羣醜卽著瑞昌王有齡會商妥辦張
玉良未能再赴浙江所有該省軍務統歸瑞昌王有齡調度江省
自句容失陷後金陵軍營喫重溧水等邑未復常郡亦尙戒嚴前

次調回援軍均未能再令赴浙見在江西復有股匪逼近信豐入浙進皖均未可定常開等處餘逆亦有竄杭之說實屬防不勝防前據慶端奏福建所派援兵三千業經飛飭繼興等迅速前進計已可抵浙境著該將軍等卽與張芾所派蕭翰慶等管帶之勇一併催提以資攻剿各軍未到之先仍就見有兵力妥籌防剿毋稍疏失將此由六百里諭令知之○庚申和春奏自賊匪竄陷句容後遂於本月初七日由溇化鎮至馬鞍山各鄉放火城內首逆知外援已到卽在七橋窰營前添築三壘攻我濠牆經張國樞督兵擊敗初九至十一日援逆由南路沙子岡直至秣陵關連營數十座而高橋門及小水關大營後路亦添賊壘城逆復於上方安德等門分路出撲張國樞督飭將士迎擊斬首千餘級十二日賊又分十數路來攻探聞賊酋陳玉城李秀城李侍賢楊輔青等統率

各路悍賊十餘萬必欲力破長牆而後已張國樑與王浚分督諸將至清波門陳家橋一帶出擊自朝至暮斃賊不下二三千該逆見東南無懈可擊於十四日由上河毛公渡等處搭造浮橋數道攻我外牆城逆從內應之是日風雨交作將士徹夜不能收隊十五日風雨愈大張國樑派隊馳赴西路救援詎料行至上河毛公渡一帶見總兵黃靖等營盤被圍數重援軍不能衝入黃靖馬登富吳天爵營中火起據衝出兵勇僉稱該三員均已力竭陣亡張國樑遂斷上方橋欲固守東北半壁臣與張國樑許乃釗相商亦惟有從小水關以東設法守禦立即傳知各營一律嚴守無如三更以後小水關附近南北各營亦皆火發臣與張國樑臣乃釗王浚即帶本營兵將分投赴援火光中接仗逾時而小水關之營亦即起火臣復與張國樑王浚在馬巷口截殺後軍止得退守鎮江

以圖再舉伏念洪逆負嵎金陵已經八載各路賊黨皆有所恃以爲聲援到處蠭起計惟有先拔本根則枝葉自萎用是竭力圖維定南北合圍之計冀絕其生路又知鋌走困鬪勢所必至自正月初九日扼斷九洑洲後卽於西南添築外牆以禦援逆不料浙西潰決良將勁兵先後調援者不下一萬三千人而涪壩宜荆防兵又調去一萬有奇旋因涪壩溧陽失守蘇常大震援浙之師又不得不調赴常郡先其所急迫溧水句容先後失陷秣陵被圍大營亦卽四面受敵矣雖添募新勇以守長牆而訓練未成心志不固致有此失就此時情形而論惟有將句容溧陽次第克復再出涪壩與皖南會師先清徽甯以至池太然後各路之師會擣金陵其勢雖緩尙無後患臣和春督師無狀功敗垂成臣張國樞有統率諸軍之責不能防患未然臣許乃釗其事圖維亦復無能補救實

屬惶恐無地惟有請旨將

臣

等從重治罪以爲僨事者戒其陣亡

之總兵黃靖副將馬登富守備吳天爵應請飭部從優議卹又奏

丹陽界常鎮兩府之閒地處適中最爲扼要茲探賊騎已至白兔

寶堰等處焚掠距丹陽均不過數十里之遙彼處防兵僅有總兵

熊天喜及副將劉成元參將林定海所部六千數百名尙屬不敷

堵剿

臣

與許乃釗督同王浚酌帶兵勇四千餘名於二十一日拔

隊前往相機剿辦張國樑暫留鎮江收集兵勇俟布置妥當亦卽

統兵前進會商攻取

上諭軍機大臣等本日據和春奏各路悍

賊圍攻金陵大營我軍力不能支退守鎮江一摺覽奏殊深憤懣

此次逆賊分路圍攻金陵大營我軍於獲勝後猝因雨雪交作致

西南隅長牆被賊攻破力不能支退守鎮江功敗垂成殊可歎惜

現在賊勢甚爲猖獗和春等擬先將句容溧陽次第克復再出溧

壩與皖南合兵先清徽甯以至池太然後各路之師會擣金陵先
芟枝葉再拔本根目下情形亦止可如此辦理卽著和春等會合
籌商激勵將士分兵攻拔各城維持全局力贖前愆此次援賊雖
眾何以一隅挫失全局渙散長圍一失卽爲該逆增負嵎之具況
大營處處火起非奸細潛伏卽自行擾亂所奏情形殊不明晰著
和春等據實覆奏江北六合等處踞匪未除原恃張國樑控馭今
張國樑退扼鎮江賊匪已跨江聯爲一氣天長未克揚州一帶殊
屬可虞李若珠前經僱軍獲咎斷難勝此重任著卽撤去幫辦飭
令仍回大營隨同張國樑剿賊其揚州督兵大員著和春張國樑
另選得力提鎮前往駐紮以資鎮守再本日已將辭煥調補江蘇
藩司其江甯藩司一缺著王夢齡補授矣江北各屬錢糧均歸江
甯藩司經理催提解充軍餉王夢齡應令其駐紮江北何處地方

俾得就近經理以專責成並應否令管江北糧臺之處均著何桂清酌定具奏至徐州地方見在逆捻充斥淮徐道一缺關繫緊要並著何桂清迅卽揀選賢能之員奏請補授以便王夢齡速赴藩司新任將此由六百里加緊諭令知之○諭本日據和春奏金陵逆賊圍攻大營官軍退守鎮江等語見在溧陽等城尙未收復止可先圖規復各城以固蘇常門戶再圖進取其江北六合等處踞匪此時和春等難於兼顧雖已諭令袁甲三等力扼北路要隘無任賊眾肆擾並諭楊載福督率水師駛赴下游會同吳全美李德麟等梭巡江面以掣賊勢而江北究無重兵駐紮深恐袁甲三等同書未能遏其兇猷北竄可虞楚軍已定大舉入皖太湖潛山業經克復自應亟籌進取都興阿病已痊愈著卽督帶馬步各隊四五千名馳赴皖北或由舒桐或由霍六進兵與袁甲三等各軍聯

紹聲勢駐紮江北進攻六合浦口天長等處以杜粵逆北擾捻匪
旁趨惟口糧軍火此時江皖斷難支應必須寬爲籌備方可無虞
匱乏卽著官文曾國藩胡林翼將如何進取之處悉心籌酌傳旨
令都興阿迅速帶兵馳往是爲至要將此由六百里諭令知之○
諭本日據和春奏此次逆首陳玉城等乘江南調兵援浙大營空
虛之際糾合賊黨十餘萬與金陵城內之賊兩路衝突勢極鴟張
和春等打仗七晝夜力竭退守鎮江惟江北未暇兼顧該逆必致
與六合等處股匪聯絡著袁甲三等督飭兵勇防其竄越清江一
路見無重兵扼守亦屬空虚並飭派赴天長之副將黃開榜等嚴
密防範袁甲三等仍激勵官軍速克定遠以杜逆擾將此由六百
里諭令知之○調薛煥爲江蘇布政使以王夢齡爲江甯布政使
甯曾綸爲江蘇按察使

由福建督糧道遷

○以金陵營盤被陷退扼鎮江

革和春職拔雙眼花翎仍暫署江甯將軍拔張國樑花翎革職
任降許乃釗四品京堂予陣亡總兵官黃靖等祭葬世職○命丁
憂副都統巴棟阿畱辦鎮江防務○辛酉諭軍機大臣等據何桂
清奏該督前因王夢齡簡放江蘇臬司催令交卸赴任當委吳棠
署理淮徐道篆兼攝徐州府事王夢齡總管糧臺勸捐等事難易
生手吳棠亦難以一人而兼兩篆請畱王夢齡辦理徐州糧臺並
以署淮徐道吳棠幫同辦理等語所奏自係爲人地相需起見惟
江北各屬錢糧均歸江甯藩司綜理如令其駐紮徐州於江北糧
臺鞭長莫及勢難令其兼管仍著何桂清妥籌具奏至吳棠既署
淮徐道斷難再令兼攝府篆所有徐州府一缺著何桂清迅速揀
選賢能之員奏請補授一面先行委員前往署理以便吳棠專辦
淮徐道任內事務將此由五百里諭令知之○雲南提督傅振邦

奏請將抗不遵調之參領佟陞等革職留營以觀後效得旨如此從輕懲辦何以示威若處處效尤潰散可立而待也○壬戌諭軍機大臣等有人奏杭州省城失陷情形由於城內之賊久伏而不知城外之賊紛來而不拒加以不服管束之潮勇豫爲內應遂致數萬士民橫罹鋒刃慘不可言臬司段光清防堵餘杭等處離省僅七十里該司於城未破之先私自回署接取眷屬派兵護送出城郡民目擊無不忿恨搖動軍心益無守志各等語臬司段光清前因其總城潛逃降旨革職拏問嗣因衢嚴緊急經瑞昌派令帶兵馳往會同饒廷選商辦防剿原因一時乏人起見茲據奏稱該革員私送眷屬致懈軍心種種貽誤情形殊堪痛恨著瑞昌王有齡仍遵前旨一俟衢嚴軍務接手有人速將該革員拏問卽以軍法從事勿得以遠戍爲開脫至潮勇豫爲內應乘勢助賊尤堪痛

恨並著該將軍等查明通賊之勇盡法懲治其不安分之勇亦須分別裁撤嚴定章程見在浙境賊氛未靖省垣重地不使亂源復萌方爲妥善原摺著鈔給閱看本日王有齡奏請將浙省皖餉局裁撤等語候補運使金安清督辦皖餉在浙江設局勸捐所得無幾徒滋擾累有礙本省餉源所有金安清在浙江督辦之皖餉局著卽撤銷惟皖省餉源少此一款未免益形支絀仍著王有齡於浙餉內酌量劃解協濟皖省毋令缺乏將此由五百里諭令知之

○聯英以病免以王夢齡署漕運總督

由江甯布政使署

○發亥諭軍機

大臣等勝保等奏見擬出省督師進剿惟豫省軍營帶隊人員不敷調遣請飭袁甲三等於總兵張得勝等三員中飭調一二員來營專帶步隊等語著袁甲三翁同書等卽於總兵張得勝滕家勝副將黃開榜三員中酌量派出一二員前往勝保軍營聽候調遣

另片奏捻匪騷張馬賊過多非添調馬隊官兵不能制賊死命等語傳振邦所撥馬隊四百名據稱尙未到營且大半無馬恐難得力昨諭令袁甲三將伊興額所帶馬隊一百數十名酌量分別去畱著該大臣察看此項馬隊如尙得力即可撥往勝保軍營前據翁同書奏吉林馬隊內無馬兵丁一百餘名擬派往豫省歸勝保調遣並著催令迅速前往此外如有可籌撥之處亦可酌量調撥以資攻剿復據勝保奏據苗沛霖稟稱蒙城一帶自趙海檀城賊圍相繼攻破賊猶負固其中真賊圍有五百座首鼠兩端者亦有五百座等語賊黨雖多總期解散其勢方不至勾結蔓延見在傳振邦會合苗練分路進攻卽著該提督等相繼籌辦妥爲招撫予以自新令其真心投誠賊眾皆爲我用攻剿自易得手將此由六百里各諭令知之○諭瑞昌王有齡奏東壩溧陽逆匪仍圖回竄

廣德建平撥兵馳援並請徽甯濟師一摺記名道員蕭翰慶一軍
前經徽防截甯助剿本日據張芾奏官軍連日攻克太平旌德石
埭三城擬令會合各軍乘勢規取池州已諭張芾等俟攻克後卽
飭令蕭翰慶迅赴廣德合力助剿並諭張芾周天受於徽甯各軍
先行酌量撥調一併馳赴廣德以資防守杜賊回竄之路仍著瑞
昌王有齡飛催福建援浙之兵迅速前進此項兵勇到浙亦可分
布各處見在金陵大營爲賊撲擾退守鎮江浙江杭嚴各屬又處
處籌防廣德建平尤不可再有疏虞致多牽掣瑞昌王有齡仍當
就見有兵力督飭帶兵各員相機合剿力固藩籬記名道員李元
度已諭令曾國藩飭赴浙省矣將此由六百里諭令知之○諭據
勝保等奏越境追剿捻匪擊回老巢豫境肅清一摺此次捻逆受
創回奔經各路官兵及各縣鄉團分投截殺屢獲大勝越境追剿

將各捻股悉數擊回老巢豫境已一律肅清辦理尙屬得手勝保見已出省督師前進擬在歸德郡城駐紮居中調度惟須步步爲營相機進剿直搗老巢並聯絡團練以固後路謀定後動計出萬全方爲妥善所請飭調總兵張得勝等赴營專帶步隊本日已諭袁甲三翁同書酌量調派並諭酌撥馬隊赴勝保軍營以利攻剿將此由六百里諭令知之○諭瑞昌王有齡奏東壩溧陽逆匪仍圖回竄廣德建平撥兵馳援並請徵甯濟師一摺廣德建平雖相繼克復而東壩溧陽等處均有賊蹤總兵熊天喜一軍已調往丹陽一路防堵僅有米興朝之軍駐廣德兵力甚單茲據瑞昌等奏稱東壩溧陽之賊分股竄出有回擾廣德建平之意距建平十餘里之蔡村一帶又聚賊數千逆蹤密邇等語見在金陵大營被賊撲擾退守鎮江蘇常正當喫緊廣德爲江浙門戶設被逆賊再行

竄踞全局又將震動前張芾派去援浙之副將王夢齡等兩隊已
經調回見在旌太石埭等縣相繼克復軍情稍鬆著卽派撥得力
官軍前往會同米興朝協守瑞昌等商調之副將陳大富等各軍
並著周天受酌量抽撥前赴廣德助剿勿稍遲誤至蕭翰慶一軍
據張芾奏飭令乘勝規取池州與水師互相聯絡辦理正當得手
之際恐未能再行他調俟攻克池州後再令取道前往廣德與浙
兵合力剿擊杜賊回竄之路卽知照官文無庸調往豫省所請浙
江江西協餉之處浙江甫經被擾恐難兼顧已諭毓科於月撥三
萬兩之外酌加數萬兩迅速撥解徽營矣將此由六百里各諭令
知之○諭張芾奏請飭駐守建德之軍擇要駐紮等語總兵普承
堯一軍前經諭知前江西巡撫惲光宸飭令駐守建德以資堵剿
茲據張芾奏稱該總兵駐軍下隅坂地方在建德西南四十餘里

中隔峻嶺雖可扼彭澤湖口一路而於建德縣城仍難保其無虞賊如上犯可由建德之東北馬田洋湖陂等處長驅直入於江西之鄱陽浮梁徽州之祁門黟縣均有鞭長莫及之患且亦可竄擾彭湖該鎮之軍臨時堵截均難兼顧是此軍以五六千眾僻守一隅於江皖大局未能全顧於事無益著毓科卽飭總兵普承堯統率所部移營馬田或洋湖陂擇要屯紮深溝高壘西可與東流水師遙爲聲援東可與石埭陸軍互相策應不獨爲規復池州地步卽江西之鄱浮徽屬之祁黟防兵皆在其後亦可隨時抽調不至爲賊所牽庶於江皖全局均有裨益另片奏徽防缺餉請飭措解等語徽防軍餉本屬缺乏見在旌太告克分軍進取涇縣馳援甯郡必須設法籌放餉銀俾免飢潰浙省又甫經被擾庫藏空虛恐不能籌及徽餉並著毓科於認解徽餉三萬兩之外每月再行籌

撥銀數萬兩儘力措解以濟急需毋稍諉延將此由六百里諭令知之○以克復太平旌德石埭三縣城賞道員蕭翰慶鹽運使銜義勇韋志俊花翎副將余永椿以總兵官用餘獎敘有差○予安徽陣亡總兵官王鳳翔等祭葬世職○甲子何桂清奏金陵大營退保鎮江後探報句容溧陽之賊日漸增多金壇宜興境內屢遭焚掠常州鎮江二府切近賊氛最爲喫重丹陽介常鎮之閒相去均止百里且當句容溧水之衝尤屬咽喉要地臣與和春函商畱張國樑在鎮江布置和春定於二十一日進駐丹陽居中調度從前大營攻剿喫緊於常鎮軍務不暇兼顧今近在丹陽各路軍情及防剿事宜應由和春張國樑統籌督辦隨時具奏其退出兵勇振旅而行者尙能自立至陸續招集之人需用鍋帳軍械實難猝辦臣已責成署藩司蔡映斗等趕緊製造源源解往並飭江南糧

臺籌撥銀十萬兩米一萬石先行委員解濟惟自寇警以來錢糧
釐捐均無指望若不力求撙節決裂卽在目前臣見已咨會和春
嚴飭翼長王浚按實在收集人數派員點驗酌給銀兩俾濟急需
勿以管帶官口報之數爲憑致滋浮冒其江北得力兵勇不滿萬
人每月需餉十五六萬羅掘尤難並咨和春轉咨李若珠速將疲
弱裁汰和春張國樑無日不以清釐整頓爲心李若珠王浚賣有
攸歸亦斷不敢稍任蒙混似此大加節省或冀勉強支持不至有
餉匱兵譁之慮 上諭軍機大臣等何桂清奏金陵大營退守鎮
江見在籌辦情形一摺金陵逆援攻撲長圍我軍退保鎮江和春
進紮丹陽居中調度各路軍情及防剿事宜自應仍責成和春張
國樑統籌督辦所有陸續招集之兵勇應需鍋帳軍械等項一時
殊難猝辦自係實在情形見據何桂清飭令署藩司蔡映斗等將

鍋帳槍礮鉛丸火藥軍械趕造解往並籌撥銀米採買鐵鍋先行
委解以濟急需見當庫項支絀之時若不力求撙節東南大局不
堪設想著和春嚴飭王浚按實在收集人數酌給口糧仍於月餉
內扣還歸款務須遴派妥員逐名點驗給領不得以帶兵官虛報
爲憑致滋浮冒其老弱傷病兵丁卽著嚴加裁汰毋許濫竽充數
至江北兵勇應需月餉羅掘尤難並著一體清釐嗣後儻有虛報
兵勇名數希圖肥己沾染營中惡習者別經發覺無論大小將弁
必當執法嚴懲不能寬貸和春等奉命督師日久無功前因退扼
鎮江僅予薄懲未加嚴譴若再不知愧奮力求整頓以圖進取保
全東南大局自問當得何罪耶有人奏周天受貪色好殺物議沸
騰近以爭奪妓女擅殺都司各營解體不戰而兵潰等語周天受
見任統兵大員連次失陷各城是否能勝重任至其平日聲名何

如有無前項劣蹟著和春何桂清密查具奏毋稍徇隱又有人奏蘇州省城添辦義團長洲縣知縣李翰文元和縣知縣馮樹勳等招募廣勇以致廣潮匪類踵至滋生事端州縣曲加袒護民情惶懼等語廣潮匪類前在蘇省盤踞滋事經群煥等查拏懲辦始得安靖見在逼近賊氛尤應豫爲嚴防卽如杭郡之變係李定太繆梓所帶之勇勾結開城前車可鑒著何桂清會同徐有壬查明此項廣勇嚴禁招募設法遣散儻有滋擾卽著按律嚴辦以安民心而弭後患將此由六百里各諭令知之○是月蠲緩安徽宿州等二十三州縣暨屯坐各衛被災被擾地方新舊額賦及雜課銀豁免安徽懷遠等三縣及臨淮鄉被擾通賦